

M091: Benediktbeurer Glaube u. Beichte II

- 150v,1 mit diseme gelouben sô jihe ich dem almehtigen gote . unde mînere
vrouwen
- 150v,2 sante Marîen . mîneme hêrren . sancte . Michael . unde allen gotes engelen
.
- 150v,3 mîneme hêrren . sancte . Johanne . unde allen gotes wîssagen . mîneme
hêrren . sancte .
- 150v,4 Petre unde allen gotes boten . mîneme hêrren . sancte . Georgien . unde
allen gotes
- 150v,5 marteræren . mîneme hêrren . sancte . Martine . mîneme hêrren . sancte .
Benedicte . unde allen gotes bîhtæren .
- 150v,6 mînere vrouwen . sancte . Margareten . unde allen gotes megeden . unde
disen heiligen .
- 150v,7 unde allen gotes heiligen . aller dere sünden die ich ie gevrûmete
- 150v,8 vone aneenge mînes lîbes unz an dise wîle . swie getâneme zîte
- 150v,9 ich die sünde ie gevrûmete dankes oder undankes . slâfente oder wachente
.
- 150v,10 genoetet . oder ungenoetet . ich jihe dem almehtigen gote . daz ich
gesündet hân . mit mir selbeme unde mit anderen
- 150v,11 mennischen . mit zorne . mit nîde . mit vîentschefte . mit urbunne . mit
hazze . mit untriuwen . mit meinen
- 150v,12 eiden . mit lügeme urkünde . mit besprâche . mit hinderkoese . mit
vluochen mit übermuote . daz riuwet mich ich jihe
- 150v,13 deme almehtigen gote daz ich mînen vater . unde mîne muoter . unde mîn
hêrtuom . unde ander mîne ebenkristene
- 150v,14 nie sô holt ne wart . noch sô triuwe . nie wart . noch sô ne geminnete . sô
ich von rehte . solte daz riuwet mich
- 150v,15 ich jihe deme almehtigen gote daz ich den heiligen sunnentac . noch ander
banvîertage . nieht sô getultet
- 150v,16 noch sô geêret . ne hân . sô ich scholte . unde mohte daz riuwet mich . ich
jihe deme almehtigen gote daz ich die heiligen
- 150v,17 dietvaste . unde ander banvaste . nie sô ne gevastete noch sô ne behielt sô
ich solte unde mohte daz riuwet
- 150v,18 mich ich jihe deme almehtigen gote daz ich mînes gebetes nie sô gepflege-
te . sô ich solte . unde daz ich mîn almuosen
- 150v,19 nie sô gegap sô ich solte . unde daz ich . witewen . unde . weisen . nie sô
getrôste . sô ich solte die in karkære wâren .
- 150v,20 unde mit siechtuome bevangen wâren . daz ich dere . nie sô gewîsete sô
ich solte unde daz ich die ellenden . nie ne

- 150v,21 geherbergete . noch den nackenten . nie gewâte . sô ich vone . rehte solte
 . daz riuwet mich . ich jihe deme almehtigen gote .
- 150v,22 daz ich den zehenden mînes lîbes und anders mînes guotes nie sô gegap sô
 ich solte daz riuwet mich . ich jihe deme
- 150v,23 almehtigen gote daz ich gesündet hân mit huore . mit huores willen . mit
 . überhuore . mit unzîtlicheme
- 150v,24 huore . mit sippeme huore . daz riuwet mich . ich jihe deme almehtigen
 gote daz ich gesündet hân mit roube
- 150v,25 unde mit diuben daz riuwet mich . ich jihe deme almehtigen gote daz ich
 mîne bîhte nie sô emzige
- 150v,26 getet sô ich solte . swenne ich si ouch tet sô tet [ich] [sie] unruochlîche .
 unde lûgelîche . sô ne tet ich sie
- 150v,27 sô durnetelîchen . nieht . sô ich solte . unde daz ich den heiligen gotes .
 lîchnamen nie sô dicke
- 150v,28 genam . sô ich solte . swenne ich inen ouch nam . sô ne behielt . ich in sô
 nieht . mit der reinicheite
- 150v,29 unde mit der kiusche mînes gemüetes unde mînes lîbes sô ich solte daz
 riuwet mich . der schulde
- 150v,30 unde aller der schulde der [ich] ie getet sider anegenge . mînes lîbes . unze
 an dise wîle . der ich
- 150v,31 gedenke . jouch der [ich] nie ne gedenke . ergibe mich . in dîne gewalt .
 truhtîn hêrre . mich ze gebüezene
- 150v,32 nâch dînen genâden . nieht nâch mînen schulden .